

# **Tabellar for kommunane**

**Tabell 1-k**

**Tabell 2-k**

**Tabell 3-k**

**Tabell A-k**

**Tabell B-k**

**Tabell C-k**

**Tabell D-k**

**Tabell E-k**

**Tabell F-k**



## Tabell 1-k

### Rammetilskot til kommunane 2020

Kommunane sitt rammetilskot blir løyvd over kap. 571, post 60–67 på statsbudsjettet. Samla rammetilskot i alt er vist i kolonne 8. Dette omfattar ikkje midlar løyvd på kap. 571, post 21 *Spesielle driftsutgifter*.

Innbyggjartilskotet med utgiftsutjamning er berekna ut ifrå talet på innbyggjarar per 1. juli 2019. Skatteutjamninga blir gjort gjennom budsjettåret, etter kvart som skatteinntektene ligg føre. I skatteutjamninga blir det nytta innbyggjartal per 1. januar 2020, og rammetilskotet til kvar einskild kommune blir justert i høve til skatteutjamninga. Endeleg skatteutjamning for 2020 er ikkje klar før i februar 2021 og er såleis ikkje med i utrekninga av rammetilskotet i denne tabellen. Endeleg rammetilskot blir altså først klart i februar 2021.

### Kolonne 1 – Innbyggjartilskot (post 60)

Kolonne 1 viser innbyggjartilskotet medrekna utgiftsutjamning, tilskot med særskild fordeling og inntektsgarantiordninga. For meir detaljert dokumentasjon av innbyggjartilskotet, sjå tabell 2-k.

### Kolonne 2 – Distriktstilskot Sør-Noreg (post 61)

Kolonne 2 viser distriktstilskot Sør-Noreg. Tilskotet er dokumentert nærare i tabell D-k. Tilskotet skal vareta kommunar i Sør-Noreg med ei svak samfunnsmessig utvikling. Tildeling av distriktstilskot Sør-Noreg tek utgangspunkt i distriktsindeksen, som er eit uttrykk for graden av distriktsutfordringar i ein kommune. Indeksen byggjer på indikatorar som sentralitet, reiseavstand, befolkningstettleik, befolkningsstruktur og -utvikling, status for arbeidsmarknaden og inntektsnivå. For nærare omtale av distriktsindeksen, sjå: <https://www.regjeringen.no/no/dokumenter/distriktsindeksen-2017/id2614814/>.

Tilskotet blir tildelt kommunar i Sør-Noreg som;

- har under 3 200 innbyggjarar, eller ein distriktsindeks på 46 eller lågare,
- har hatt ei gjennomsnittleg skatteinntekt dei siste tre åra som er lågare enn 120 pst. av landsgjennomsnittet (målt per innbyggjar), og
- ikkje får distriktstilskot Nord-Noreg.

Kommunar med færre enn 3 200 innbyggjarar får eit tilskot per kommune. Satsane varierer etter verdien på distriktsindeksen. Kommunar med distriktsindeks på 35 eller lågare får tilskot etter høgaste sats. Kommunar med ein høgare verdi på distriktsindeksen får tilskot etter lågare sats, slik at kommunar med distriktsindeks over 46 får halvparten av den høgaste satsen.

For kommunar med 3 200 innbyggjarar eller meir blir tilskotet gjeve med ein sats per kommune og ein sats per innbyggjar. Kommunar med distriktsindeks på 35 eller lågare får tilskot per kommune og per innbyggjar med høgaste sats. Kommunar med høgare verdi på indeksen får tilskot med høvesvis 80, 60, 40 og 20 pst. av den høgaste satsen.

Tilskotet blir rekna ut ifrå talet på innbyggjarar per 1. januar 2019. Departementet har nytta den same distriktsindeksen som i inntektssystemet for 2019. Distriktsindeks for

nye kommunar er berekna som eit vekta gjennomsnitt av indeksen for dei tidlegare kommunane. Satsane for 2020 er justerte med anslått pris- og kostnadsvekst i kommunesektoren.

*Satsar for distriktstilskot Sør-Noreg 2020:*

Kommunar med 3 200 innbyggjarar eller meir			Kommunar med under 3 200 innbyggjarar
Distriktsindeks	Sats per kommune (1 000 kr)	Sats per innbyggjar (kroner)	Sats per kommune (1 000 kr)
Indeks 0–35	1 273	1 152	5 875
Indeks 36–38	1 019	922	5 289
Indeks 39–41	764	691	4 700
Indeks 42–44	508	461	4 114
Indeks 45–46	255	231	3 525
Indeks over 46	0	0	2 938

**Kolonne 3 – Distriktstilskot Nord-Noreg (post 62)**

Kolonne 3 viser distriktstilskot Nord-Noreg i 2020. Tilskotet blir gitt med eit kronebeløp per innbyggjar til alle kommunane i Nord-Noreg og Namdalen. Satsen er differensiert mellom kommunar i ulike fylke. Den geografiske inndelinga av satsane som vart nytta ved fordelinga av tilskotet i 2019 vidareførast i 2020. Satsen for den einskilde kommune blir dermed ikkje påverka av samanslåinga av fylka Troms og Finnmark.

Småkommunetillegget til kommunar med færre enn 3 200 innbyggjarar i Nordland fylke, Namdalen i Trøndelag fylke og tidlegare Troms fylke (utanfor tiltakssona) blir gjeve etter dei same kriteria og satsane som distriktstilskot Sør-Noreg. Kommunar i tidlegare Finnmark fylke og kommunar i tiltakssona i tidlegare Troms fylke får småkommunetillegg etter ein høgare sats. Tilskotet blir rekna ut ifrå talet på innbyggjarar per 1. januar 2019. Departementet har nytta den same distriktsindeksen som i inntektssystemet for 2019. Distriktsindeks for nye kommunar er berekna som eit vekta gjennomsnitt av indeksen for dei tidlegare kommunane. Satsane for 2020 er justerte med anslått pris- og kostnadsvekst i kommunesektoren.

*Satsar for distriktstilskot Nord-Noreg 2020:*

Til alle kommunar i Nord-Noreg og Namdalen, satsar per innbyggjar		
Kommunar i:	Sats per innbyggjar (kroner)	
Nordland og Namdalen	1 812	
Troms (utanfor tiltakssona)	3 476	
Tiltakssona i Troms	4 095	
Finnmark	8 487	
Småkommunetillegg til kommunar med under 3200 innbyggjarar		
Distriktsindeks	Småkommunetillegg per kommune, kommune utanfor tiltakssona	Småkommunetillegg per kommune, kommunar i tiltakssona
Indeks 0–35	5 875	12 724
Indeks 36–38	5 289	11 451
Indeks 39–41	4 700	10 180
Indeks 42–44	4 114	8 907
Indeks 45–46	3 525	7 635
Indeks over 46	2 938	6 362

#### **Kolonne 4– Regionsentilskot (post 65)**

Regionsentilskotet blir tildelt kommunar der det er fatta eit nasjonalt vedtak om samanslåing i perioden 2014-2017, og som etter samanslåinga får over om lag 8 000 innbyggjarar. Kommunar med storbytilskot kan ikkje motta regionsentilskot.

Tilskotet blir fordelt dels med ein sats per innbyggjar og dels med ein sats per kommune. I 2020 er satsen per samanslåing 3,256 mill. kroner, og satsen per innbyggjar er 68 kroner. Satsane frå 2019 er prisjusterte i 2020. Ved berekning av tilskotet er det lagt til grunn innbyggjartal frå 1. januar 2019.

#### **Kolonne 5 – Veksttilskot (post 66)**

Veksttilskotet er eit tilskot til kommunar med særleg høg folkevekst. Tilskotet er grunngeve med at kommunar med høg folkevekst på kort og mellomlang sikt kan ha vanskar med å tilpasse tenestetilbodet til ei veksende befolkning. Det kan vere utfordrande å finansiere dei nødvendige investeringane utan at det verkar inn på tenestetilbodet.

Veksttilskotet blir gjeve til kommunar som har hatt ein gjennomsnittleg årleg befolkningsvekst over vekstgrensa dei siste tre åra (1.1.2016 – 1.1.2019). Vekstgrensa er ført vidare på 1,4 pst. for 2020. I tillegg må kommunane ha skatteinntekter under 140 pst. av landsgjennomsnittet dei siste tre åra (målt per innbyggjar) for å få tilskotet. Veksttilskotet blir gjeve som eit fast beløp per nye innbyggjar ut over vekstgrensa. Satsen for 2020 er justert med anslått pris- og kostnadsvekst i kommunesektoren til 60 615 kroner. Grunnlaget for utrekninga er dokumentert nærare i tabell D-k.

#### **Kolonne 6 – Storbytilskot (post 67)**

Storbytilskotet går til kommunane Oslo, Bergen, Trondheim, Stavanger og Kristiansand. Frå 2020 føreslår departementet at òg nye Drammen kommune mottek tilskotet.

Tilskotet blir fordelt med eit likt beløp per innbyggjar. Innbyggjartalet i kommunane Trondheim og Stavanger auker på grunn av samanslåingar i 2020, og dette gjev ein auke i storbytilskotet for desse kommunane. Satsen per innbyggjar for 2020 er justert med anslått pris- og kostnadsvekst i kommunesektoren til 383 kroner. Ved berekning av tilskotet er det lagt til grunn innbyggjartal frå 1. januar 2019.

#### **Kolonne 7 – Skjønstilskot fordelt av fylkesmannen (post 64)**

Kolonne 7 viser skjønstilskot fordelt av fylkesmannen for 2020. I tillegg er det vist fylkesvise rammer for skjønstilskot til fordeling gjennom året. Fylkesmannen held i ulik grad att skjønstilskot til fordeling gjennom året.

#### **Kolonne 8 – Rammetilskot 2020**

Kolonne 8 viser rammetilskotet for 2020 (sum av kol. 1–7). Midlar til fordeling gjennom året er inkludert i landssummen.